

UTHM anjur usahawan alumni bagi rapat hubungan

DALAM usaha meluaskan rangkaian dan merapatkan lagi hubungan antara universiti dan graduan, Universiti Tun Hussein Onn Malaysia (UTHM) melalui Pusat Kemajuan dan Hubungan Alumni (CARE) menganjurkan *Luncheon Talk* bersama Usahawan Alumni UTHM di Petaling Jaya, baru-baru ini.

Majlis berkonsepkan santai makan tengahari itu menemukan 25 usahawan alumni mewakili empat generasi terdiri daripada graduan Pusat Latihan Staf Politeknik (PLSP), Institut Teknologi Tun Hussein Onn (ITTHO), Kolej Universiti Teknologi Tun Hussein Onn (KUiTTHO) dan UTHM.

Program disempurnakan Penolong Naib Canselor (Hal Ehwal Pelajar dan Alumni) UTHM, Prof. Dr. Amir Hashim Mohd. Kassim .

Sesi perkongsian perniagaan dan perkongsian pengalaman yang berlangsung selama tiga jam itu dimanfaatkan sepenuhnya peserta dengan tumpuan perbincangan menjurus kepada hubungan rangkaian perniagaan masing-masing.

Luncheon Talk turut mengumpulkan mahasiswa yang berminat dengan bidang keusahawanan dan turut bercita-cita menjadikan bidang ini sebagai kerjaya pilihan selepas tamat pengajian nanti.



SEBAHAGIAN peserta yang terdiri daripada pelajar dan bekas pelajar yang menyertai *'Luncheon Talk* bersama usahawan alumni UTHM di Petaling Jaya, Selangor baru-baru ini.

Salah seorang usahawan yang berkongsi pengalamannya kepada mahasiswa pada program itu, Anuar A Rahman yang juga Ketua Pegawai Eksekutif Gold Silver Resources Sdn. Bhd. (GSR), berkata, kejayaan yang diraihinya hari ini berkat didikan ilmu yang diperolehi di UTHM.

“Saya sedia berkongsi ilmu secara percuma khususnya berkaitan teknik pemasaran dan peluang perniagaan emas dan perak,” katanya.

Statistik menunjukkan hampir 20 peratus graduan UTHM menceburi bidang keusahawanan dan untuk itu, Care UTHM mengadakan usaha untuk menjejaki para graduan tersebut bagi mengetahui profil dan faktor-faktor penglibatan mahasiswa dalam bidang keusahawanan.

Pada program itu, turut dihebahkan berkaitan inisiatif Care UTHM menubuhkan Tabung Sumbangan Alumni

yang bertujuan untuk menambahkan dana bagi menjamin kebajikan seperti khairat kematian, bantuan kecemasan, bantuan modal niaga dan yuran pengajian serta khidmat komuniti.

Usaha itu dilihat mampu meningkatkan hubungan lebih erat antara universiti dan para graduan, di samping menetapkan sejumlah besar dana untuk disumbangkan kepada Tabung Endowmen universiti.